

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA
PARLIMEN KE-EMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 10 JULAI 2019 (RABU)

SOALAN NO. 25

Minta **MENTERI PENGANGKUTAN** menyatakan apakah perkembangan terkini berhubung perkhidmatan keretapi Shuttle Tebrau antara JB Sentral dan Woodlands Singapura, bagaimana tren pertumbuhan bilangan penumpang dan apakah usaha Kerajaan untuk berunding dengan Singapura yang dilihat tidak ingin bekerjasama dengan kita dalam menambahkan kekerapan perkhidmatan tersebut demi memenuhi keperluan rakyat setempat.

JAWAPAN

Yang di-Pertua,

1. Untuk makluman Yang Berhormat, perkhidmatan tren Shuttle Tebrau dari Johor Bahru ke Woodlands, Singapura telah bermula pada 1 Julai 2015 dengan 14 trip perkhidmatan sehari. Perkhidmatan pengangkutan alternatif kepada rakyat bagi kedua-dua negara ini terus mendapat sambutan yang memberansangkan terutamanya pada waktu puncak pagi dari jam 5.30 ke 8.30 pagi setiap hari Isnin hingga Jumaat.
2. Bagi memenuhi permintaan penumpang, melalui rundingan dengan Singapura, jumlah perkhidmatan tren Shuttle Tebrau ini ditingkatkan secara berperingkat sehingga yang terkini jumlah perkhidmatan bertambah kepada 31 trip sehari dan kesan positifnya adalah bilangan penumpang turut meningkat dari 1,500 kepada 7,400 orang sehari.
3. Statistik bilangan penumpang perkhidmatan tren Shuttle Tebrau pada tahun 2015 hingga tahun 2018 adalah seperti berikut:

Tahun	Bilangan Perkhidmatan Sehari	Bilangan Penumpang
2015	14 trip (mulai 1 Julai 2015)	433,093
2016	22 trip (mulai 17 Januari 2016) 24 trip (mulai 16 September 2016)	1,747,797
2017	24 trip	2,279,931
2018	31 trip (mulai 28 Februari 2018)	2,713,196

4. Dengan mengambil kira permintaan penumpang yang semakin meningkat, Malaysia telah mengemukakan permohonan kepada pihak *Singapore Immigration & Checkpoints Authority* (ICA) pada 21 November 2018 untuk meningkatkan jumlah 31 trip sehari sedia ada kepada 36 trip sehari. Pihak ICA pada dasarnya bersetuju dengan cadangan ini tetapi meminta ianya dilaksanakan pada

penghujung tahun 2019 tertakluk kepada penyiapan kerja-kerja naiktaraf *Woodlands Train Checkpoint* (WTCP) oleh pihak ICA.

5. Bagaimana pun, pada 5 Januari 2019 pihak ICA telah memaklumkan akan perancangannya untuk memindahkan sebahagian kakitangan Imigresen Singapura di WTCP bagi menangani kesesakan CIQ di Tambak Johor dan langkah ini akan memberi kesan kepada jumlah kekerapan tren Shuttle Tebrau. Bagi memastikan kebergantungan rakyat yang menggunakan perkhidmatan tren Shuttle Tebrau ini tidak terjejas, pihak Kementerian ini sedang dalam proses rundingan dengan pihak Singapura agar rancangan pemindahan sebahagian kakitangannya ke CIQ di Tambak Johor dikaji semula.

Sekian, terima kasih.